


揚州叢刻



揚州叢刻



揚州瓊花集

五卷

二卷

物類彙編

瓊花集序

吾揚瓊花世傳海內一本信矣今花久枯粹騷人墨士各以傳聞爲據或謂卽玉蘂或謂卽聚八仙或謂漢前已有茲花或謂隋煬帝以觀花來幸江都以余考之皆非也蓋瓊花形色微類八仙瓊花異香芬郁八仙無香也若唐人所謂玉蘂則與之大異矣矧長安之唐昌觀集賢院潤州之招隱山其時皆有玉蘂惡在其爲一本者乎宋至道中王元之守揚州作瓊花詩其敘云不詳何木俗謂瓊花若卽爲玉蘂元之何以云不詳何木耶自後韓魏公劉原父鮮于子駿

相繼賦咏歐陽永叔又作亭花上扁曰無雙由是遐
陬絕壤無不知吾揚有瓊花矣若五代以前花之有
無靡可考見乃以大業荒游歸咎茲花目爲亡國之
祥其誣不已甚乎且煬帝東巡諸所詭異之跡備載
南部煙花記等書當時果有茲花其事尤爲殊絕師
古輩顧肯畧之而弗錄耶蓋兵火薦更郡志散軼閭
巷之談遞爲口實遂令絕代之芳永蒙不根之誚惜
哉惜哉成化中浙人有爲花集者止據黃冠舊簡潦
畧成編雖知隋事之誣而猶踵延元封號之謬中間
所載李衛公劉夢得詩俱咏玉蘂花者餘篇悉用兔

園俚語冒稱唐宋名公之作予少讀而疑之然未敢
以語人近里人有購得寶祐維揚志者茲花始末具
在其詩篇斷自王黃州與隋事畧不相涉予乃釋然
以喜遂手自抄錄復命仲兒守貞遍考羣籍增所未
備舊錄贗篇悉爲芟汰又刪潤考證諸語冠于簡端
於是花事粲然可睹間以質諸太僕蜀岡盛公公曰
此瓊花實錄也是錄出花之誣不辯而自明矣嗟夫
昔予遊兩都四方人士無不問予茲花者予與花均
爲揚產不能悉其事以對心甚愧之茲新集告成揮
麈之餘藉爲談助豈非考古之一快哉或曰集中詩

賦諸篇得失互異今槩爲收錄靡所銓擇何耶曰考証詳矣讀考証而諸篇之得失可知矣作者俱古今名人烏得而去取之哉本朝訖于宏治近者不錄吾郡人作者甚多盡載之涉於冗非纂述之體擬別爲一集云

嘉靖乙未季秋日江繁都玉齋曹璿序

瓊花集目錄

卷之一

考證

遺事

卷之二

宋人詩二十九首

元人詩二十一首

本朝人詩十一首

卷之三

詩餘

卷之四

卷之五

賦舊有馮海粟賦其詞語太俳恐非馮撰
海粟集久不傳真贗莫辨未敢輒入

記

宋人詩十一首

宋人詩十一首

宋人詩十一首

卷之二

宋人詩十一首

卷之一

卷之一

瓊花集卷一 明 郡人玉齋曹璿編

揚州 陳恆和書林刻

考証

王元之 宋至道二年知揚州瓊花詩敘曰揚州后土祠有花樹

一株潔白可愛不知何木俗謂之瓊花瓊花見於名

人題詠始此宋子景宋次道失於詳攷乃謂卽唐之

玉蘂 宋景文筆記曰維揚后土廟有花曰玉蘂王禹偁愛賞之更稱曰瓊花按許慎說文曰瓊赤玉

也王不領其義非白花名也○宋敏求春明退朝錄曰揚州后土廟有瓊花一株或曰自唐所植卽李魏

公所謂玉蘂花也舊不可移徙今京師亦有之○蔡寬夫詩話曰李衛公玉蘂花詩為潤州招隱山作也

今招隱無復此花詢之士人皆莫知為何物或云卽今揚州后土祠瓊花是也自王元之始易其名晏元

獻嘗以李善文選注質之而尤延之全唐詩話又謂云瓊乃赤玉與花不類也揚州唐昌觀是以蕃釐爲唐昌也謬亦甚矣

周益公必大曰唐人甚重玉蘂唐昌觀有之集賢院有之翰林院亦有之予往因親舊自鎮江招隱來遠致一本條蔓如茶蘂種之軒楹冬凋春茂柘葉紫莖再歲始著花久當成樹花苞甚微經日漸大暮春方開八出鬚如冰絲金粟花心復有碧筩狀類膽瓶其中別抽一英出眾鬚上散爲十餘蘂猶刻玉然花名玉蘂乃在於此羣芳所未有也宋子景劉原父宋次道博洽無比不知何故疑爲瓊花王元之知揚州但

言未詳何木俗呼爲瓊花子京何故以誣元之蔡君

謨疑作寬夫又引晏同叔之言以爲證甚無謂也劉夢得

雪藥瓊絲之句最爲中的何必拘李善赤玉爲瓊之

注耶

劉詩詠玉藥花益公謂詠瓊花誤矣

寶佑維揚志曰唐朝唐昌觀有玉藥花劉禹錫所謂
玉女來看玉樹花異香先引七香車是也唐內院亦
有玉藥花李德裕與沈傳師草詔同賞故德裕詩曰
玉藥天中木金閨昔共窺傳師和曰曾對金鑿直同
依玉樹陰是也招隱山亦有玉藥花李德裕所謂吳
人初不識因予嘗賞翫乃得此名是也由是論之豈

一處有哉豈非瓊花明矣東坡瑞香詞有后土祠中

玉藥之句者非謂卽玉藥花謂瓊花如玉藥之白爾

宋學士敏求長安志曰長安安業坊唐昌觀有玉藥

花每發若瓊林瑤樹元和中春物方盛車馬尋玩相

繼一日有女子年可十七八衣綠繡衣垂髻雙鬟無

簪珥之飾容色婉婉迥出於眾從以二女冠三小僕

僕皆舛髻黃衫端麗無比既下馬以白角扇障面直

造花所異香芬馥聞於十步之外觀者疑出宮掖莫

敢逼視佇立良久令小僕取花數枝而出將乘馬過

謂黃冠曰曩有玉峯之期自此可以行矣時觀者如

堵或覺煙飛鶴唳景物輝煥舉轡百餘步有輕風擁

塵隨之而去須臾塵滅望之已在半天方悟神仙之

遊餘香不散者經月餘時嚴休復元稹劉禹錫白居

易俱有詩嚴休復詩終日齋心禱玉宸魂消目斷未
逢真不如滿樹瓊瑤葉笑對藏花洞裏人羽車潛下
玉龜山塵世何由觀薜蘿顏唯無情枝上雪好風吹
綴綠雲鬟白居易和羸女偷乘鳳去時洞中潛歇弄
瓊枝不緣啼鳥春饒舌青瑣仙郎可得知元稹和弄

玉潛過玉樹時不教青鳥出花枝的應未有諸人覺
只是嚴郎卜得知劉禹錫和玉女來看玉藥花異香
先引七香車攀枝弄雪時回顧卻怪人間日易斜雪
藥瓊絲滿院春衣輕步步不生塵君平簾下徒相問
長伴吹簫別有人楊巨源詩晴空素豔照霞新香灑
天風不到塵持贈昔聞將白雪藥珠宮上玉花春張
籍詩千枝花裏玉塵飛阿母宮中見亦稀應共諸仙
鬪百草獨來偷折一枝歸九色雲中紫鳳車尋仙來
到洞仙家飛輪迴處無蹤跡唯有班班滿地花武元
衡詩琪樹年年玉蕊新洞宮長閉綵霞春日暮落英
鋪地雪獻花無復九天人楊凝詩瑤華瓊藥種何年
蕭史秦嬴向紫煙時控綵鸞過舊邸摘花持獻玉皇
前王建詩一樹瓏璵玉刻成飄廊點地色輕輕女冠
夜覓香來處唯見階前碎月明李衛公德裕潤州
招隱山觀玉藥花寄沈侍師詩玉藥天中樹金闕共
昔窺落英閑舞雪密葉乍低帷舊賞煙霄遠前歡歲
月移今來想顏色還似憶瓊枝自注曰內署沈大夫
所居門前有此樹每花落空中回旋久之方集庭際
大夫草詔之月邀予同玩又云此樹吳人不識因予
賞玩乃得此名沈酌詩曾對金鑿直同依玉樹陰雪

英飛舞近煙葉動搖深素萼年年密衰容日日侵勞
 君想華髮僅欲不勝簪白居易惜集賢院玉藥花
 有懷王校書詩芳意將闌風又吹白雲離葉
 雪辭枝集賢讐校無閑日落盡瑤花君不知江少虞
 皇朝類苑曰孫晁在揚州使人訪求瓊花山中甚多
 但歲苦樵斧野燒故本不得大而花不能茂耳孫傷
 之以詩曰可憐遐僻地常化燎原灰紹熙廣陵志曰
 類苑此說蓋誤以八仙花為瓊花也八仙花雖類瓊
 花而瓊花之香如蓮花可愛雖剪折之餘韻亦不減
 此八仙之所無也

鄭興裔

淳熙十五年知揚州

曰瓊花大而瓣厚其色淡黃聚八

仙小而瓣薄其色微青不同者一也瓊花葉柔而瑩

澤聚八仙葉粗而有芒不同者二也瓊花葉與花平不結子而香聚八仙葉低於花結子而不香不同者三也

廣陵遺事曰瓊花有三異凡花皆落瓊花則隨風而銷一異也以水煎葉服之可已疫癘二異也一歲花葉東西稀密而境內穡事豐歉如之三異也

清江貝瓊洪武中人曰讀書所有白花一株狀類揚州瓊

花而花損一葉俗稱為八仙云為賦一絕且悼瓊花

之不復見而獨見此也詩曰一夜東風吹白雪化為蝴蝶過西家七香車遠人何

處空認唐昌觀裏花按見詩亦以蕃釐為唐昌誤矣九葉之說宋諺已然寶佑志諸詩或云八蓓或云